

usaha-usaha menghapuskan bahasa al-Qur'ān itu dari setapak ke setapak berjalan sehingga kita lihat di tanah air kita ini bahasa itu hampir-hampir tidak diketahui, tetapi *al-hamduli Lāh* bahawa masih ada segolongan orang-orang kita yang masih fasih dan masih boleh diharap untuk berkata-kata dan untuk bermunazarah dengan orang-orang luar di dalam bahasa al-Qur'ān itu.

Jika usaha-usaha kerajaan-kerajaan yang mempunyai kemampuan terus dihidupkan, ertinya kerajaan-kerajaan yang kaya di dalam negara-negara Arab menghidupkan bahasa itu dengan mengadakan usaha-usaha seluas-luasnya mengembangkan perkembangannya ke seluruh Timur jauh dan Afrika untuk menghidupkan dan meluaskan bahasa Arab iaitu bahasa al-Qur'ān nescaya bahasa itu akan menjadi bahasa persatuan seluruh umat Islam dan dengan demikian maka cita-cita untuk menyatukan cita-cita untuk mempadukan seluruh negara-negara Islam tidak begitu payah dan tidak begitu sulit, sebab dengan pengertian bahasa yang satu, mereka akan dapat bersama-sama bertukar-tukar fikiran dan berkata-kata dengan tidak payah lagi terjemah-menterjemah di antara satu dengan lain. Bahkan semangat bahasa itu sendiri akan tertanam ke dalam sanubari orang-orang Islam kerana dengan fahamannya dapat mereka mendalam dan mengetahui selok-belok ajaran al-Qur'ān dengan lebih tinggi dan lebih rapat.

Sekiranya hal-hal yang tersebut ini mendapat perhatian terutamanya daripada Jalālah al-Malik Faisal dan juga kerajaan Kuwait serta Republik Arab Bersatu, maka yang demikian ini tentulah mereka akan mengadakan suatu

himpunan atau suatu pertubuhan yang bakal dibuat bersama-sama untuk perkembangan bahasa al-Qur'ān di seluruh Afrika dan Timur jauh ini supaya dengannya dapatlah berkembangnya bahasa itu dan dengan berkembangnya bahasa maka berkembanglah dengan sendirinya ajaran-ajaran Islam. Ajaran-ajaran Islam yang mendalam itu tentulah membawa kepada tiap-tiap umat celik – celik dalam segala ertinya untuk berjuang melepaskan daripada segala penjajahan, daripada segala belenggu yang sangat merbahaya kepada keselamatan dan kesejahteraan perseorangan dan tanah air mereka.

Ini dapat diperhatikan apa yang terjadi di Indonesia baru-baru ini. Sungguhpun Sukarno telah menindas begitu hebat terhadap kepada pertubuhan-pertubuhan Islam yang bergerak seperti Masyumi dan lain-lainnya, namun semangat Islam masih tertanam di dalam dada mereka. Apabila kesedaran timbul maka gerakan dengan nama Islam itulah yang dapat menghapuskan, dapat merobohkan kekuasaan-kekuasaan anti-tuhan yang berjalan di Indonesia itu, dan dari kekuasaan dan sinaran cahaya Islam itulah berdiri pemuda-pemuda yang membangkitkan umat Islam Indonesia di atas kesedarannya meruntuhkan perkara-perkara yang merugikan dan yang menghalang kemajuan dan kebesaran Islam dahulu. Dengan itu pula pemerintah Sukarno jatuh dan tidak mendapat tempat yang sewajarnya sebagaimana yang dicita-cita olehnya kerana Sukarno sendiri membelaikan ajaran-ajaran agama dan menindas umat Islam di Indonesia.

Jadinya pengaruh di dalam perjuangan yang berlaku di Indonesia di dalam

perkembangan bahasa Arab, bahasa al-Qur'ān itu maka begitulah majunya umat Islam di Indoensia dan dengannya diharap akan menjadi contoh kepada kita di Tanah Melayu dalam perkembangan-perkembangan menghadapi masa hadapan kita.

Inilah juga yang diharap supaya usaha-usaha itu lekas dilaksanakan dan cepat mendapat bantuan-bantuan daripada kerajaan-kerjaan Islam bagi seluruh dunia Islam supaya perkembangan Bahasa al-Qur'ān, bahasa persatuan umat Islam lekas merebak dan tersiar di seluruh kepulauan kita ini dan juga di seluruh Afrika.

* * *

Perhatikan

keputusan peperiksaan Universiti

Malaysia tahun ini menunjukkan bahawa daripada 703 orang yang lulus hanya ada 156 orang Melayu – ertinya lebih kurang dua puluh peratus sahaja Melayu. Ini terbahagi dari:

Ijazah jurusan *Art* 125 orang daripada jumlah 334 orang (lebih kurang 35 peratus); jurusan Sains 5 orang daripada 183; Pertanian 2 daripada 23 orang; dan Diploma Pendidikan 21 orang daripada 115 orang. Jumlah penuntut-penuntut Melayu di seberang laut (di Australia dan England) hanya 5 peratus sahaja.

* * *

50 tahun dahulu *grant-grant* tanah 90 peratus dipunyai oleh orang-orang Melayu; sekarang hanya 500 sahaja daripada 32,000 *grant* tanah yang dipunyai oleh orang-orang Melayu – **satu kemajuan?**